

Na osnovu čl. 60. stav 3. Zakona o visokom obrazovanju Kantona Sarajevo – prečišćeni tekst (*Službene novine Kantona Sarajevo, br. 22, od 27.08.2010. godine*) i čl. 9. Pravila studiranja za prvi ciklus studija na visokoškolskim ustanovama Univerziteta u Sarajevu, na prijedlog Vijeća Odsjeka za geografiju, Nastavno-naučno vijeće Prirodno-matematičkog fakulteta Univerziteta u Sarajevu, na sjednici održanoj 7.02.2011.godine donijelo je

**PRAVILNIK O TERENSKOJ NASTAVI  
NA ODSJEKU ZA GEOGRAFIJU  
PRIRODNO-MATEMATIČKOG FAKULTETA SARAJEVO**

**I OPĆE ODREDBE**

Član 1.

Ovim Pravilnikom o terenskoj nastavi na Odsjeku za geografiju Prirodno-matematičkog fakulteta Univerziteta u Sarajevu (u daljem tekstu: Pravilnik) uređuje se način izvođenja i organizacije terenske nastave na Odsjeku za geografiju (u daljem tekstu: Odsjek) Prirodno-matematičkog fakulteta Sarajevo (u daljem tekstu: Fakultet).

Član 2.

Terenska nastava je obavezan vid nastavnog procesa, kao i svaki drugi nastavni predmet, a izvodi se na terenu.

Terenskim nastavnim procesom primjenjuju se i praktično provjeravaju na terenu teorijska znanja.

Terenskom nastavom se: rekognosciraju horološke geografske cjeline, kompariraju vizuelne geografske pojave, procesi i transformacije sa usvojenim teorijskim znanjima, tematski kartiraju geografski procesi i pojave, vrše praktična istraživanja prema zadatoj temi uz primjenu terenskih sredstava i pomagala, obavljaju najrazličitiji komponentni i kompleksni praktični i drugi zadaci.

Ostvarivanje ciljeva terenske nastave vrši se maršrutno i stacionarno putem komponentnih ili kompleksnih geografskih eksplanacija.

Ponavljanje maršrute po godinama studija treba izbjegavati.

### Član 3.

Terenska nastava se organizuje u tuzemstvu i inozemstvu. Terenske nastave u inozemstvu se mogu organizovati za više godine studija prvog ciklusa, a prema potrebi i za studente drugog ciklusa.

Terenske nastave u inozemstvu se mogu kombinovati sa istim u Bosni i Hercegovini.

### Član 4.

Terenska nastava se realizira na razini nastavnih smjerova, a prema nastavnom planu i programu iz nastavnih predmeta: Terenska nastava I, Terenska nastava II, Terenska nastava III, Terenska nastava IV, Prostorno-planerska praksa u geografiji I, Prostorno-planerska praksa u geografiji II i Prostorno-planerska praksa u geoekologiji i turizmu.

### Član 5.

Terenska nastava se organizuje i izvodi na kraju parnog semestra akademske godine.

Terenske nastave iz prethodnog stava su višednevne i to u obimu broja nastavnih sati nastavnih predmeta date akademske godine.

Terenska nastava se može organizovati kao poludnevna ili jednodnevna u toku nastavnog procesa predavanja i vježbi.

Terenske nastave iz prethodnog stava se izvode iz predmeta koji tematskim geografskim sadržajem pruža mogućnost terenske opservacije u okolini Sarajeva.

## **II PRAVA I OBAVEZE UČESNIKA TERENSKJE NASTAVE**

### Član 6.

Terensku nastavu pohađaju studenti geografije.

Učešće na terenskoj nastavi potvrđuje se potpisom u index/upisnicu od strane predmetnog nastavnika ili voditelja terenske nastave, a ocjenom u index/upisnicu i prijavu za prezentaciju ili uspješno završen i odbranjen rad iz dobivenog terenskog zadatka.

## Član 7.

Terensku nastavu organizuju i izvode nastavnici i saradnici (voditelji), koji učestvuju u realizaciji nastavnog procesa iz predmeta akademske godine u kojoj se izvodi terenska nastava.

Voditelje terenske nastave imenuje Vijeće odsjeka.

Jednog nastavnika ili nastavnika i saradnika Vijeće odsjeka imenuje za organizatora terenske nastave.

## Član 8.

Organizator terenske nastave u saradnji sa voditeljima terenske nastave sačinjava plan i program terenske nastave.

Plan i program terenske nastave sadrži:

- Vrijeme realizacije;
- Maršrutu i stacionare;
- Učesnike terenske nastave (studenti, voditelji i organizator)
- Kratak programski sadržaj u kojem se preciziraju: ciljevi, oblici nastavnog rada, nastavne metode, sadržaj rada, nastavna sredstva i nastavna pomagala, zadaci i očekivani rezultati.

Plan i program terenske nastave za tekuću akademsku godinu utvrđuje Vijeće odsjeka tokom mjeseca marta i objavljuje ga na oglasnoj ploči najkasnije do 1. aprila tekuće akademske godine.

## Član 9.

Organizator terenske nastave je odgovoran za realizaciju plana i programa terenske nastave.

Voditelji terenske nastave pomažu organizatoru i odgovorni su za realizaciju programskih sadržaja iz matične oblasti za koju su zaduženi.

## Član 10.

Program terenske nastave definiše se prema realno iskazanim finansijskim mogućnostima studenata.

#### Član 11.

Troškove terenske nastave (prijevoz, smještaj, ishrana i dr.) snose studenti, koji zajedno sa nastavnicima i saradnicima, koncenzusom odlučuju o izboru najpovoljnijeg ponuđača (agencije) za organizaciju prijevoza, smještaja, ishrane, posjete znamenitostima i sl.

Troškove terenske nastave nastavnika i saradnika snosi Fakultet.

#### Član 12.

Studenti učesnici terenske nastave se pripremaju za realizaciju iste ispunjavanjem stručnih i tehničkih zahtjeva koji proizlaze iz plana i programa terenske nastave.

Upoznavanje studenata sa planom i programom terenske nastave obaveza je organizatora i voditelja.

#### Član 13.

Učesnici terenske nastave dužni su se ponašati primjereno i odgovorno, u skladu sa Zakonom o visokom obrazovanju Kantona Sarajevo, Etičkim kodeksom Univerziteta u Sarajevu, Pravilima studiranja, Statutom i dr. općim aktima Univerziteta i Fakulteta.

Svako ponašanje koje nije u skladu sa propisima iz prethodnog stava biće od organizatora i voditelja terenske nastave oštro sankcionisano.

#### Član 14.

Šef Odsjeka i predmetni nastavnici na početku svake akademske godine obavještavaju studente o okvirnim planovima izvođenja terenske nastave.

U organizaciji terenske nastave mogu učestvovati i studenti, a obavezno učestvuju studenti završnih godina i studenti kojima je to dio studijskog programa.

Ostvarivanje svojih prava i obaveza u organizaciji terenske nastave studenti postižu na sjednicama Vijeća odsjeka putem svojih predstavnika ili u neposrednoj komunikaciji sa organizatorom terenske nastave.

#### Član 15.

Realizaciju višednevne terenske nastave odobrava Dekan Fakulteta, a na prijedlog Šefa Odsjeka.

Odobrenje Dekana iz prethodnog stava uključuje ovjeren spisak studenata sa organizatorom i voditeljima terenske nastave.

#### Član 16.

Po završetku terenske nastave, organizator i voditelji obavezni su podnijeti izvještaj Vijeću odsjeka.

### **III PRIJELAZNE I ZAVRŠNE ODREDBE**

#### Član 17.

Ovaj Pravilnik stupa na snagu danom donošenja na Nastavno-naučnom vijeću Prirodno-matematičkog fakulteta Univerziteta u Sarajevu.

Pravilnik je objavljen na oglasnoj ploči i službenoj web stranici Odsjeka za geografiju.

U Sarajevu, 7.02.2011.godine

Šef Odsjeka za geografiju

Dr.Safet Nurković, redovni profesor

Dekan Fakulteta

Dr.Muriz Spahić, redovni profesor